

नेपाःया प्रसिद्धगु गुँला धर्मया लसताय् पिथना

गुँला धर्मया महत्त्व

व

श्वया ज्याम्बः



चमिः

हेमराज शाक्य

नेपाःया प्रसिद्धगु गुँला धर्मया लसताय पिथना

गुँला धर्मया महत्त्व व श्वया ज्याभवः

हेमराज शाक्य

प्रकाशक
हिरण्यवर्ण महाविहार
तारेमाम् संघ,
नागबाहाः यल ।

प्रकाशक :
हिरण्य वर्ण महाबिहार
तारेमाम् संघ
नागबाहा, यल ।

ने. सं. : १११७ श्रावण शुक्ल प्रतिपदा

कम्प्यूटर सेटिङ्ग :
रीति लेजर प्रिन्ट
नागबाहा, यल ।
फोन नं. ५३४८६७

थाकू :
बागमती छापाखाना
गावहा, वनबाहा, यल ।
फोन नं. ५३३८४७

चैत्य प्रशंसा

लक्ष चैत्य सहस्राणां स्थावर चैत्यञ्च तथा
स्थावर चैत्य सहस्राणां स्तूपकृतमहत्फलम्
स्तूपानाञ्च सहस्राणां धातुस्तूपमहत्फलम्
एक चैत्यं प्रतिष्ठाप्य सर्वदेव प्रतिष्ठिताः
एक चैत्यं प्रपूजेन सर्वदेवाः प्रपूजिताः
एक चैत्यं प्रसंस्कृत्य सर्वदेवाश्च संस्कृताः
चैत्य विम्बं प्रतिष्ठाप्य व्रतदानं च भोजनम्
यः कुर्याद्भक्तिसंयुक्तः बोधिभाष्क भवेत्ध्रुवम्
सर्वपापक्षयं यान्ति शम्भू चैत्य प्रदर्शनात्
कोटि जन्म तपः पुण्यमेक शम्भू प्रणामतः
ये शम्भूं शरणं यान्ति न ते गच्छन्ति दुर्गतिम्
प्रहाणां सर्वपापानि बौद्धपदं लभन्ति ते

- स्वयम्भू पुराणे द्वितीय अध्याय

समर्पण

गुलिनं त्रिधातु भुवनस स्तूप-चैत्य प्रतिष्ठा जुल ।
उगु सम्पूर्ण स्तूप-चैत्यप्रति सुनां गुम्हसिनं
श्रद्धा भक्ति पूर्वक उपासना, आराधना,
प्रदक्षिणा, पूजासत्कार व गुण कीर्तन
एवं जिर्णोद्धार तथा श्री शोभा
अभिवृद्धि यांना बिल, वसपोल
पिंगु लुमन्तिस जिगु
दुनुगलंनिसें भिन्नकं
श्रद्धाञ्जलि
द्वहलपा
जुल ।

पिका पाखें

गुंला धर्मया महत्वयात ध्यान तथा यलया हिरण्यवर्ण महाविहारस ६० दै न्ह्यो थ्व हे श्रावण शुक्ल प्रतिपदा कुन्हू हिरण्यवर्ण महाविहार, तारेमाम् संघ नी स्वंगु खः । गुंलाया लच्छि यंक थी थी थासय् धर्म कार्य ज्वीगु ज्या थौं कन्हे आपासिनं मसिया वन । थ्व हे गुंलाथ्व लच्छि यंकं ज्वीगु धर्म कार्यया विवरण दुगु थ्व सफू तारेमाम् संघं प्रकाशन यायेगु अवसर बीया बिज्यागुलीं तारेमाम् संघया सकल सदस्यपिसं वसपोल लेखक पण्डित हेमराज शाक्यज्यू प्रति आपालं कृतज्ञता प्रकट यानाच्चना । थ्व सफूतीं नेपाया सकल दाजुकिजा, तताकेहेंपिन्त गुंलाथ्व या महत्वया भतिचा जक ज्ञान द वन धासां जिपिं लेखक प्रति आभारी जुइ ।

बज्रराज शाक्य

अध्यक्ष

हिरण्यवर्ण महाविहार, तारेमाम् संघ
नागबहाल, यल ।

त्वमिया थःगु खँ

नेपाःया थःगु परम्परागत बौद्ध धर्म, बौद्ध संस्कृति, बौद्ध कला व बौद्ध इतिहास पुरातात्विक विषययात कया अध्ययन अनुसन्धान यायेगु इच्छा दुपिं सुनं स्वदेशी अथवा विदेशी यान्त्र पर्यटकपिसं निश्चय न ध्यानाकर्षण यायेमाःगु विषय खः । गुंला धर्मया महत्व व विशेषता छु दु धका चिन्तन मनन याइपिसं थुगु गुंला धर्मया चाड पर्वयात कया विचाः यायेमाःगु दु ।

थुगु गुंला धर्म लच्छिया दुने न्हचाकेमाःगु विविध कार्यक्रम छु दु ले धका जिज्ञासा तथा अध्ययन अनुसन्धान याइपिसं निश्चय न थुगु गुंला धर्मयात कया अवलोकन यायेमाःगु आवश्यक जू ।

थुगु च्वसुया विषययात कया विगत २०५१ सालं लोटस रिसर्च सेन्टरया "गुंला धर्म देशना विशेषांक" पत्रिकास प्रकाशित जुइ धुंकूगु खः । हर्षया विषय थ्व खः कि थ्वहे च्वसुयात कया नागबहालया तारेमाम् संघं हानं हर्षपूर्वक पुस्तिकाया रूपे प्रकाशित यानाब्यूगु जुल ।

उकिं वसपोल सहयोगी व कल्याणमित्र पासापिन्त दुनुगलं निसें हार्दिक कृतज्ञता प्रकट यासे धन्यवाद बियाच्चना ।

थुकि गनं द्वं विद्वं जूगु दतसा विज्ञ पाठकवर्गपिके क्षमा याचना यानाच्चना । लिसें थुगु गुंला धर्मया पुस्तिका प्रकाशन जूगु पुण्यानुभावं सर्वत्र सर्वदा कालं स्वस्ति कल्याणमंगल जुया च्वनेमा धका नेपाःया धर्मराजिक चैत्यकुल नायक श्री स्वयम्भू धर्मधातु वागीश्वरया श्री चरणकमलस न्हिथं प्रार्थना याना च्वना जुल । अस्तु ।

हेमराज शाक्य

ललितपुर महाबुद्ध,

थैना, ज्वथा बाहाः

फोन नं. ५२३२५०

उपस्थित श्रद्धालु धर्मपासापि ।

धौयागु शुभदिन नेवाः बौद्ध संस्कृति कथं दकले सकले तःजिगु गुंला प्रारम्भ जुइगु श्रावण शुक्ल प्रतिपदा उदय जूगु महान् पुण्यतिथि खः । थुगु गुंलापारु प्रारम्भ जुइवं नेपाःमि बौद्धजनपिनि चित्तस सद्वर्माङ्कुर चुलि जायाः विभिन्न किसिमया कुशल संग्रह यायेगु नितिं पुण्य साधन कर्मस कोशिश याना श्रद्धाभक्ति निश्चय तयालि अनेक प्रकारया धर्मकर्मस जोजल्पाः यनिगु छगू अतिकं उत्तमगु दिं खः । थुगु गुंला धर्म प्रारम्भ जुइवं सर्वथा अकुशल पापकर्म, मत्यो, मज्ज्यूगु दुष्कर्मगु ज्याखं हाकुतिनालि गुंला लच्छियकं छगू नं छगू पुण्य साधन कर्मस तत्पर जुया च्वनीगु दिन जुल । उदाहरणया लागि उगु पुण्यसाधन कर्मया ज्याभवः सम्पन्न याये नितिं थथे ज्या न्हचाका च्वनी । गथेकि-

सुधन्हापां दनां बागमती वना तीर्थ स्नान याइ, चेके वनी, नामसंगीति ब्वनी, तुतः ब्वनी, भद्रचरी प्रणिधान ब्वनी, धारणी ब्वनी, भजनकीर्तन याइ, धर्मोपदेश न्यनेगु व कनेगु जुइ, सूची शील नियम पालन याइ, आमिषवस्तु व मद्यमांस, धुम्रपान त्वतेगु याइ । मत्यो मज्ज्यूगु निषेधकर्म त्वःती । शील धर्म विपरीत आचरण मयाइ, सम्यक् जीविका कथं हनेगु स्वइ । अवसं, यो अवसं, न्यान्हु अवसं, माय् अवसं च्वनी । धञ्जलियाःया सिसाबुसा व साखःति दान बिइ । कर्मविपाक निर्देशन रूपय् धर्मपासा मिहता छायास्वइगु याइ व अले थुगु कथं श्री स्वयम्भू धर्मधातु स्वरूपं विभिन्न प्रकारया चैत्य-चीबहा, स्तूप-धूर, धर्मधातु, वज्रधातु आदि गुरु बुद्ध, बोधिसत्व, आर्यतारा, प्रज्ञापारमिता आदि बौद्ध देवीदेवता प्रदक्षिणा व परिक्रमाया रूपय् नसंचा ईलय् दनां

सुमधूर बाद्यवादन, धाः, खिं, दमखिं, मृदंगया तालय् शृङ्गभेरी न्येक् पुया बुद्धगीत (म्येँ) हाला बही, बहा पतिकं बोगी वनी । दण्डवत् प्रणाम याना म्हाधू दानालि थःथःगु श्रद्धाभक्ति कथं अनेक पूजोपकरण -पुष्प, धूप, दीप, गन्ध, रस, छत्र, ध्वज, पताक, चामर, उखेर, निसला, पिण्डपात्र, सत्तुचूर्ण आदि द्रव्यलपा वनी । ध्वहे सन्दर्भय् गुलिनं चुक, ननि, गःली, लाछि, लिबि, क्यबस प्रस्थापित, सम्पूर्ण बहा, बही, कचाबहा दक्कोफुक्क थासय् वना उत्साह उमंगपूर्वक दीपयात्रा (मतयाः) वनेगु ज्या जुया च्वनीगु नं जुल । थुलिजक मखु अभु लुचिचो थायेगु, स्यंल्हों ज्या यायेगु, लं ज्या यायेगु, पंजरां बिइगु, दानदत्त गुधि हनेगु आदि बुद्ध दिपंकर तथागत चाःहुयेकेगु, गनं गनं सुन्दर मधुर ध्वनिया लचय् दानगाथाया सः ध्वया च्वनीगु लिसेलिसें बौद्धसंघ, जिनसंघ, आर्यसंघ जात्राया प्रमाणं शाक्यभिक्षु, वज्राचार्य, ब्रम्हचर्यभिक्षु, श्रामणेरक एवं चैलकपिं क्वतः ज्वना उखें थुखें चाःचाःहुला च्वनी । एवंप्रकारं बौद्ध सांस्कृतिक सम्पदा ब्वज्याया रुपय् बहीचो ब्वयेगु (बौद्धकला प्रदर्शनी) समेत क्यनेगु, स्वःवनेगु तक नं ज्या जुया च्वनीगु जुल ।

थुगु कथं ज्योतिरुप श्री स्वयम्भू महाचैत्य विराजमान जुया च्वंगु बुद्ध जन्मभूमि नेपाःया बौद्ध परम्परा कथं हनाः वयाच्वंगु बुद्ध धर्म, बौद्ध संस्कृति, बौद्ध कला, बौद्ध आदर्श जायाच्वंगु महत्वपूर्ण गौरवमय इतिहास साक्षी दयाच्वंगु थुगु गुंला धर्मया महिमा अतिकं प्रसिद्ध जुयाच्वंगु जुल । धात्येँ धायेमाल धाःसा थुजाःगु किसिमया पर्व धितिरिति बन्देज विश्वया गुगु नं बौद्ध देशय् वना स्वल धाःसा नं दुर्लभ जुइ । “गुंला धर्म” नेपाःया थःगु हे विशेषतां जाःगु महत्वपूर्णगु गौरवपूर्णगु संसारया गनं नं मदुगु छगू धार्मिक सम्पदा खः ।

परन्तु थुगु गुंला धर्मया मूल स्रोतया आधार धैगु हे वसपोल श्री स्वयम्भू महाचैत्ययागु आनुभावं जुयाच्वंगु धाःसा नं छुं पाइमखु । थुकीयागु हे विकासक्रम खः धाःसा नं अत्युक्ति जुइमखु । ध्वहे श्री स्वयम्भू महाचैत्ययागु उच्चकोटीगु आदर्श प्रति परिलक्षित याना श्रद्धेय

भी पूर्वाचार्यपिसं नेपाःया बौद्ध संस्कार संस्कृतियात धाराप्रवाह न्ह्याका वया च्वंगु जुल । थुगु विषययात कया नं हानं छगू उदाहरण प्रस्तुत याना च्वना । गथेकि-

नेपाःया सम्पूर्ण बौद्ध विहार, तीर्थ, उपतीर्थ, गुम्बा एवं लाछि, ननि, चुक, गःली व पर्वत पर्वतय् च्वंगु चैत्यया विकासक्रम हे वसपोल श्री स्वयम्भू चैत्ययागु अनुरूप खः । हानं बौद्ध संस्कार जन्मनिसें चूडाकर्म, विवाह, दीक्षा तथा मृत्यु संस्कार व श्राद्धकर्म पर्यन्त विधि विधानय् तक नं पंचबुद्धात्मक पंचज्ञान श्री स्वयम्भूयात परिलक्षित यासे विशेष स्थान प्रदान याना वयाच्वंगु खनेदु । थुलिजक मखु, अज्ज नेपाःमि बौद्धतय्गु रितिधितिइ कुतुकुला दुहाँ वना स्वत धाःसा “तिं भिं भिं काये यःसा दुहाँ दुहाँ वा” धया तःगुथें उकी दुने दुहाँ वना वातुवाला स्वत धाःसा नं श्री स्वयम्भू ज्योतिरुप प्रभाश्वर धर्मकाययागु ज्ञान, ध्यान, दर्शन सुलाच्वंगु खनेदइ । उदाहरणया लागी प्रसंगवस निगू प्यंगू खँ पाठकपिंगु न्ह्योने प्रस्तुत याना च्वना-

भी नेपाःमि बौद्धतय्सं छुं ततःधंगु धर्मकर्म याइवले थःथःपिनिगु छयेंया मूलुखाफुसय् पंचबुद्ध अंकित याना चाचिं च्वकेगु चलन दु । ध्व खः, उच्चकोटी दर्शनया प्रतिनिधित्व यानाच्वपिं पंचकुलया अधिष्ठात्री देवता श्री स्वयम्भू पंचबुद्धयात दुहाँ वक्को पतिं पिहाँ वक्को पतिं धयाथें नतमस्त जुया छयें क्वछुना वन्दना याना, स्वागत सत्कार याना वयाच्वंगु ध्व नेपाःमि बौद्धतय्गु नितिं “आश्रय स्थान”, “शरण स्थान” धका भावना याका वयाच्वंगु जुल । ध्व खँ स्पष्ट जू, नेपाःया बौद्धत पंचबुद्धया उपासक खः धैगु । अज्ज वास्तु निर्माण विधि अनुसार छयें दने सिधय्का छयें पलिस्था याइवले छयेंयात स्थिरोभव वाक्य ब्वना न्यंकेमाः । उगु स्थिरोभव वाक्य छयेंया दकले च्वय् च्वंगु थइमायात वैरोचन तथागतयागु संज्ञा बिया तल अथेहे पंचभ्याःयात पंचबुद्ध ।

भीसं मचाबले सर्वप्रथम विचारम्भ यायेत न्हापालाक हे गोन्हलय् वसपोल श्री स्वयम्भू धर्मधातु वागीश्वरयात लुमंका

“ॐ नमो वागीश्वराय” धका ब्वना वयाच्चना, सयेका वयाच्चना । ध्व परम्परा न्हापांनिसैं छद्यला वयाच्चना । नेपाःया बौद्धतय्सं वसपोल श्री स्वयम्भू धर्मधातु वागीश्वरयात गुबलें ल्वःमंके फइमखु । अफ् भीसं ध्व नं धया वयाच्चना, चिकुलां निभालय् च्वनेबले छुं जुया निभाः मत्वलकि स्यंगुद्यो श्री स्वयम्भूयात अनुस्मरण याना नामोच्चारण याना प्रकृतियात धम्मि. बियाच्चनी - “हुंकन धाःसा त्वः त्वः थन धाःसा मत्वः मत्वः त्वय्ला मत्वय्ला स्यंगुद्योया पालि निपा भागी” । थुकीं सीदु ज्ञानविज्ञान छुं मस्युनिपिं मस्तय्सं हे स्यंगुद्योया नां कायेवं श्री सूर्य प्रकाश जुइ, निभा त्वइ, सुपायें चिलाः वनी धैगु आत्मविश्वास याना वया च्वन तिनि । नेपाःया बौद्ध परम्परानुसार बदे छुयेगु, पंयेथः लुयेगु, नायः लुयेगु, थपा त्वयगु व सम्यक्, नरां, पंजरौं आदि जुइगु लसताय् छत्रंकू भव्य न्यायकीबले नं थासंद्यो धका चीबहाद्यो न्हचोने तया भव्य नयेगु याना वया च्वंगु नं खनेमदुगु मखु । हानं दीक्षाथें जाःगु रहस्यक्रिया जुइबले नं सप्ताहाभिषेक, दशाभिषेक, चतुर्दशाभिषेक थेंजाःगु अनुत्तरतन्त्रयोग अनुसार विधि विधान जुइबले नं पंचबुद्ध चिन्ह अंकित मुकुटाभिषेक बिइगु याना वया च्वंगु खनेदु । थुलि जक मखु गुरु वज्राचार्यपिसं षोदशलास्या कया पूजा याइबले यज्ञहोमया पूर्णाहुति आदि जुइबले पंचबुद्ध मुकुटं पुया पंचबुद्धयात ईलय् ब्यलय् थुंगु किसिमं थासंथासे उच्चकोटी स्थान बिया सम्मान याना वयाच्चंगु खनेदु । सूत्र तन्त्रपाखें नं असंख्य तःधनां च्वंगु त्रिकालबुद्धपिसं प्रशंसा यानातःगु भीगु विहार विहारय् ब्वना वयाच्चंगु आर्यनामसंगीति नं आखिरय् ध्वहे पंचबुद्धया ज्ञान-पंचज्ञानसंग्रहया रुपय् माने याना वयाच्चंगु धायेफु । ध्वहे कारणं “श्री स्वयम्भू धर्मधातु वागीश्वर” व “आर्यनामसंगीति” निम्हं छम्ह खः धैगु प्रमाण चीबहा चीबहालय् धर्मधातु वागीश्वर मूर्ति तया क्यना तःगुलिं स्पष्ट जू । अफ् धात्थें धायेधाःसा क्रियातन्त्र, चर्यातन्त्र, योगतन्त्र व अनुत्तरयोगतन्त्र पाखें पिज्वःपिं बाहच, गुहच, अभ्यन्तरया देवी देवतापिसं नं धारण यानाच्चंगु पंचभूषण - चक्री, कुण्डल, कण्ठी, रूचक, मेखलाया अर्थविशुद्धि बिचा याना स्वल धाःसा नं ध्वहे पंचबुद्धया पंचज्ञानया प्रतिकात्मक रुप खः धका तन्त्रय् उल्लेख

याना तःगु खनेदु । हानं भीसं भावना याना पूजा याना वया च्वनापिं विभिन्न देवीदेवतापिं नं ध्वहे पंचबुद्धया कूल पाखें उत्पत्ति जूपिं खः धका वर्णन याना तल ।

थुलि जक मखु भीसं गुलिनं अनेक देवीदेवताया नामं जात्रा उत्सव नखःचखः न्यायेका वयाच्चना, उकी मध्येसं तःधनां च्वंगु अति भव्यगु महत्वपूर्णगु आपालं लस्करं ह्वाःगु अमिताभ पुत्र श्री आर्यावलोकितेश्वर करुणामय बुंगद्योयागु रथजात्रा माने याना वया च्वना । थुगु रथया नं दकले सकले च्वय् वसपोल स्वयम्भू बिज्याका तल । थुकीं प्रमाणित याःगु दु - श्री स्वयम्भू आदिबुद्ध गुलितक तःधं धैगु । लिसेलिसैं नेपाःयागु बुद्धधर्मय् असंख्यय् महत्वपूर्णगु बौद्ध जगतय् दुर्लभगु द्वादश वर्षीय “सम्यक् महादान गुथि” न्यायेकिबले तक नं उगु समारोहय् स्वीस्वकोटी देवतापिनि च्वय् श्री स्वयम्भू भगवान बिज्याका सर्वोपरिस्थान प्रदान याना वया च्वन । ध्व धिति नं ध्वहे श्री स्वयम्भू महाचैत्यया छत्रछायालय् च्वना हे न्यायेका वया च्वंगु खनेदु । थुगु कथं स्वयम्भू चैत्ययागु महत्व प्रति ध्यान आकर्षित यासे श्रद्धापूर्वक सुवर्ण चैत्यया प्रमाणं लखलख ल्याखं धंका लुचिद्यो (चैत्य) थाकेगु याना वया च्वन । हानं बहापूजा वनीबले सर्वप्रथम श्री स्वयम्भू महाचैत्यनिसैं आरम्भ यायेगु याना वया च्वंगु जुल ।

वसपोल श्री स्वयम्भू भगवान बौद्धतय्गु नितिं जक महत्वपूर्ण मजुसे शैवमार्गीपिसं नं उतिकं सम्मान याना वयाच्चंगु खनेदु । देवातिदेव महादेव श्री पशुपतिनाथं विरुपाक्षयागु क्रूरतां बचय् जुइत मुखाष्टमिकुन्हुया दिनय् पंचबुद्धात्मक स्वयम्भू अंकित मुखलं पुया श्री स्वयम्भूया सम्मान याना वयाच्चंगु खैं इतिहासं कना वया च्वंगु दु । थुलि जक मखु वैष्णवीमार्गया प्रमुख देवता भुइजःसि नारायणद्योया मुकुटय् नं अक्षोभ्य बुद्ध अंकित याना तःगु दु । बुद्धनीलकण्ठ नारायणया अपभ्रंश रुपय् बुढानीलकण्ठ जूवंगु धका धाइ । खनं खः ध्व सुन्दर शान्त भव्य मूर्ति बौद्ध, शैव, वैष्णव स्वंगू संप्रदायं एकीकरण याना तया तःगु नेपाली संस्कृतिया थःगु हे विशेषता खः । ध्वहे आदर्श नालाः जुजु

सिद्धिनरसिंह मल्लं थःगु लायकूया न्ह्योने दयेके ब्यूगु कृष्ण मन्दिरय् नं च्वसं "शिवलिङ्ग" स्थापना याना तल, ध्वया नं च्वसं "अवलोकितेश्वर" अंकित चैत्य तया तल । थौकन्हे थुगु मूर्ति खने मदये धुंकल । थुलि जक मखु, यल लायकुली च्वंगु लुंभ्यालय् नं अमिताभ बुद्ध पुत्र "पद्मपाणि, सृष्टिकर्ता लोकेश्वर" अंकित याना उचित सम्मान याना वया च्वन । गुलिनं बहा बही, कचाबहा दयेका तल उगु विहारया क्वापाःचो, गन्धूरी देवताया न्ह्योने पंचबुद्धात्मक स्वयम्भू चैत्यया विकासक्रमया रूप्य निर्माण जूगु छगू नं छगू किसिमया चैत्य बहा बहीया केन्द्रवर्ति स्थानय् प्रतिष्ठा यासे श्रीशोभा बृद्धि याना तल । ध्वहे परम्परायात भावभक्ति याना वया च्वन । ध्व नं छगू स्वयम्भूयागु प्रभाव धाःसां अत्युक्ति जुइ मखु । हानं ध्वहे बहा बहीया छत्रंकूजुआजु, आजुपिसं नं वहे पंचबुद्ध अंकित आजु तपुलिं पुया नेपाःया बौद्ध संघया स्थविर रूप्य इज्जत तया वया च्वंगु जुल ।

धुजाधुजाःगु महत्वपूर्ण गौरवमय जीवित परम्परा दयाच्वंगु थौतक नं अविस्मरणीय रुपं न्हयानाच्वंगु प्रसिद्ध धर्मावतार "गुंला महिना" खः । थुगु गुंला लच्छिया दुने छु छु धार्मिक कार्यक्रम हना वया च्वना धैगु विषययात कया थन न्हयब्वया च्वनागु जुल ।

खतु थुगु गुंला धर्मया ज्याभवः गुंला महीनां हे याये माःगु छायालय, मेमेगु महीना पाखे न्हयाकूसां ज्यूगु खःनि । अथेनं, दुरदर्शी प्रातःस्मरणीय श्रद्धेय भी पूर्वाचार्यपिसं गुंला महीनायात हे विशेष स्थान बिया तल, पुण्य प्रशंसा आपाः दु धका धया तल । ध्वहे महिनायागु मूल्य मान्यता अप्पो संख्या दु धका महसूस याना वया च्वन । धायेकि गुंला महीनां धर्मकर्म यायेगु गुलि गथे कारणं प्रसिद्ध जू, उत्तम जू धैगु विषययात कया उकी दुवाला स्वयंबले नं निम्न प्रकारया दुर्लभ संयोग सुसंयोग चूलाःगुलिं मेमेगु महीना स्वयां गुंला महीना अतिकं प्रसिद्ध जूगु खनेदु । गथे -

१. नेपालय् विद्यमान जुयाच्वंगु मतमतान्तर बौद्ध, शैव, शाक्त, वैष्णव एवं सौर, गणपत्य, कापालिक, नाथसंप्रदाय आदिया प्रसिद्ध

देवस्थल, बहा, बही, देगः, गुम्बा व मठ आदि गुलिनं दया च्वन उलिमध्ये सर्वश्रेष्ठ भालपा तया तःगु सुप्रसिद्धगु दकले सकले पुलांगु सर्वोत्तमगु चैत्यकुल नायक श्री स्वयम्भू महाचैत्ययागु गुण गौरव एवं उच्चकोटी दर्शन ज्ञानया प्रतिनिधित्व याना वया च्वम्ह ज्योतिरूप श्री स्वयम्भू महाचैत्ययात सर्वोपरि स्थान बिया केन्द्रिय रूप्य श्रद्धा भावभक्ति यायेगु विशेष पुण्य पर्व तिथि ध्वहे गुंला महीना जुया च्वन ।

२. प्राचीन कालय् श्रृङ्गकेतु राजां चैत्यभक्ति याना उद्धार जूगु संस्मरणय् प्रतिष्ठापित इमाद्वचैत्यया वर्षवन्दन (बुसाधं) जूगु शुभदिनयात लुमंका गुंला धर्म प्रारम्भ जूगु हिसाबं गुंला धर्म माने याना वया च्वंगु जुल ।
३. एवं क्रमं अतीत कालय् राजा सर्वानन्द सम्यक् न्यायेका श्री दीपंकर तथागत निमन्त्रणा याःगु लसताय् "दीपावति नगर", गुइतःया छम्ह अति श्रद्धावति नकिंजुं अति कष्ट सिया सम्यक् आजीविका याना सम्यकय् श्रद्धार्पण याःगु पुण्यतिथि गुंला महीना खः ।
४. अतीत कल्पय् छगू समय ब्रम्हा नं थःगु न्यागः शीरमध्ये छगः शीर बुद्धयात द्रुहलप्यूगु पुण्य तिथियात अनुस्मरण यानां गुंला धर्म प्रसिद्ध जूगु जुल । अज्ज थथेनं धया तःगु दु -वहे ब्रम्ह शीर्षया प्रतीक रूप्य क्वतः ज्वना सम्यक् पंजराबले दान काःवनेगु परम्परा माने याना वयाच्वंगु दु ।
५. वासुकी क्षेत्र नामं प्रसिद्ध जुयाच्वंगु नेपाल मण्डलस अतिवृष्टि, अनावृष्टि, खण्डवृष्टि, उत्पातवृष्टि, घनघोरवृष्टि मजुइमा, लिसें सुवृष्टि जक जुया सहकाल जुया च्वनेमा धैगु हेतुं गुंला महीनाय् नाग पंचमिया दिनस नागपूजा याना वया च्वन ।
६. सर्वार्थसिद्ध राजकुमारं "अनुत्तर सम्यक् सम्बोधि ज्ञान" प्राप्ति याना असंख्य मारगणतय् तयाका सम्यक्संबुद्ध जुया बिज्यागु शुभ उपलक्ष्यय् गुंला धर्म प्रसिद्ध जूगु जुल ।

७. नेपाःया थःगु प्राकृतिक वातावरण अनुकूल कथं सयसाम्हा अन्नवस्तु वा पिइतः गुलिनं सिन्हा ज्याया भवलय् कार्यकारणं असंख्य कीपतंगया प्राण हथ्या याना उब्जनि जूगु अन्नवस्तु खः, इपिं विना अपराधं सीपिं सम्पूर्ण कीपतंगपिंगु दिवंगत आत्माप्रति स्वर्ग सुखशान्ति प्राप्ति जुयेमा धैगु हेतु लिसें प्राणीघातक जूगु प्रायश्चित्त मोचन जुया थःम्हनं दुर्गति भोग याये म्वाःलिमा धका विशेष धर्मकर्म यायेगु गुंला महीना ।
८. अज्ज थुजाःगु प्रकारं याना दुःख कष्ट सिया सिना तुल्य परिश्रम याना गुलि नं वा पिना तयागु खः, उगु सम्पूर्ण अन्नवस्तु सल्लफल्लं सप्रे जुया दिन दोब्बर रात चौब्बर प्रमाणं हृष्टपुष्ट जुयेमा धका पुण्यसाधन याना वया च्वंगु गुंला महीना ।
९. चतुर्युग सत्य, त्रेता, द्वापर, कलि मध्ये अधमगु कलियुग उदय जूगु श्रावण महीना जूगुलिं कलि धैगु हे पापक्लेश मारकर्म अभिवृद्धि जुइगु जुया कलियुग धका धाइ । थुगु कलियुगया दोष निवारण नितिं सक्को फक्को पुण्य याना सौभाग्य लाभ याये नितिं गुंलां विशेष धर्मकर्म यायेगु उत्तम ।
१०. नेपाःया थःगु सम्बत्सर तिथिमिति गणना अनुसार न्हापागु महीना खः "थिला" । थुगु थिलानिसें ल्याः खायेबले श्रावण महीना धैगु च्याला फुना गुलाय् क्यंवः, उकीं च्याय् हाइगु व च्याय् फुना गुला क्यनीगु ध्व तसकं मभिं धाइगु चलन दु । थुगु अरिष्ट दोष निवारण नितिं नं गुंलां विशेष धर्मकर्म याका तःगु खनेदु ।
११. भारताधिपति सम्राट् अशोकं थः गुरु भिक्षु उपगुप्तलिसे थःगु सम्बोधि यात्राया भवलय् थः श्रीमती तिष्यरक्षिता व म्हचाय् मयजु चारुमती ब्वना श्री स्वयम्भू महाचैत्य दर्शन पूजन नितिं थन बिज्यावले यल शहरयागु गौरव वृद्धि नितिं प्यंगू युग उदय जूगु पवित्र दिनयात लुमंका "प्यंगः थूर" स्थापना याना थकल । उगु थूरया प्रतिष्ठापन शुभकार्य नं ध्वहे गुंला महीना पाखे जूगु दु धाइ ।

१२. ज्योतिषविद् आचार्यपिसं गुंला महीनायात श्रावण धका प्रसिद्ध याना थिल । कारण छाय् धाःसा भी गृहस्थीपिं अप्पो याना विषय प्रपंचय् जक भुलय् जुया धर्मकर्म याये मलाःपिं अजापिंगु नितिं सर्वप्रथम धर्मय् मन लाकेतः धर्म श्रवण यायेगु याकेगु भालपा गुंला महीना अप्पो याना धर्मयागु चर्चापरिचर्चा न्यनेगु, न्यंकेगु उत्तम महीना जुया श्रावण धया तःगु जुल ।
१३. उपर्युक्त कारण गुंला महीना लच्छि जक जूसां भीगु मभिंगु संस्कार न्हंकेतः भिंगु संस्कार पाखे छद्यलेया नितिं भीगु ध्व दश इन्द्रियं धर्मकार्यस जोजलपेगु आवश्यक खंका भीतः धर्मकार्यस गुंला महीनां अप्पो अभ्यास याका तःगु खनेदु । धायेकि -

- भिखां** - बुद्ध बोधिसत्वपिनिगु मूर्ति, चित्र, पौभा, धार्मिक हलंज्वलं, स्वःवनेगुया रुपय् बहीचो स्वःवनेगु याना तल ।
- न्हेपन** - बही विहारय् पूजापाठ, स्तोत्र, भजन, गीत, आदिया शब्द न्यनेगु व लिसें धर्म श्रवण बाखें न्यनेगु ।
- न्हासं** - पूजोपकरण वस्तु पुष्प, धूप, दीप एवं फलमूल, पक्वानया सुगन्ध वास नंत्वना, सांसारिक विषयया वासना मद्य, मांस, धुम्रपानया वासना तापाकालि सद्वर्तन चेतना हयेगु ।
- म्हुतुं** - सूत्र, मन्त्र, धारणी, स्तोत्र ब्वनां अवाच्य वचन मल्हाःसे केवल सत्य, शान्ति, प्रियधर्म वाक्य जक प्रयोग याना सद्वर्तन चेतना हयेगु ।
- म्ये** - पूजाया प्रसाद ग्रहण याना मद्य, मांस, धुम्रपानया रस मकासे शुद्धगु नींगुजक आहार याना सद्वर्तन चेतना हयेगु ।
- न्हातं** - जपमाला, कमण्डलु, पुस्तक, वज्रघण्ट, ताःयागु ज्याय् संलग्न जुयालि परन्तु प्राणीयात सास्ति यायेगु व खुया कायेगु, कपिं मिसातय्गु म्हाय् स्पर्श मयासे सद्वर्तन चेतना हयेगु ।

- तुति** - अपवित्रगु स्थान गमन जुइगु त्वःता बहा, बही, गुम्बा, तीर्थ आदि पुण्यक्षेत्रस विचरण जुया सद्धर्म चेतना हयेगु ।
- सिंग** - थः स्त्री पुरुषया पाखे जक संतुष्ट जुया अब्रम्हचर्या मयासे सद्धर्म चेतना हयेगु ।
- म्ह** - भिंगु, मांगलिक उपहार वस्तु वज्र, वज्रघण्ट, ताः, डमरु, छत्र, ध्वज, पताक आदि धर्मवस्त्र, काषायवस्त्र स्पर्श यानां सांसारिक विलास सामग्री पाखें अलग जुया सद्धर्म चेतना हयेगु ।
- चित्त** - काम, क्रोध, लोभ, मोह, माया, अहंकार भाव त्वःता श्रद्धा, त्याग, शील, भय, श्रुत, वीर्य, प्रज्ञा, करुणा ब्वलंकेगु, त्रिशरण, बोधिचित्त अनुस्मरण यानां सद्धर्म चेतना हयेगु ।

थुजाःगु प्रकारं सद्धर्म चेतना जागृति हइगु महत्वपूर्ण पर्व दिन पुण्यतिथिया शुभसंयोग चूलाःगु अति पवित्रगु दिन भालपा भीसं गुंला लच्छिया दुने छु छु कार्यक्रम न्हचाका वया च्वना धैगु विषययात कया आः थन छसिकथं छगू छगूया संक्षिप्त परिचय न्हचब्वया च्वना :-

१) तीर्थ स्थान

सुथन्हापां ब्रम्हमुहूर्तय नसंचा ईलय दनां बागमती वना तीर्थ स्नान याइ ।

२) चैत्य भक्ति

बुद्ध बोधिसत्व एवं स्वयम्भू चैत्य धर्मधातु, वज्रधातुया अग्रे च्वनां यथाशक्य पूजा भावभक्ति याना प्रदक्षिणा याना च्वनी ।

३) नामसंगीति पाठ

त्रिकालया बुद्धिपिसं प्रशंसा याना तःगु, गुरु महामञ्जुश्रीयागु विशेष महत्व दया च्वंगु, असंख्य तःधंगु सूत्र आर्यनामसंगीति सुमधूर घोषं भक्तिपूर्वक लय तथा चैत्यपुंगभया न्हचोने च्वना छगू स्वरं ब्वना च्वनी ।

४) भजनकीर्तन

विहारय अथवा सतःफले, ननि, लाछि, चुकसं च्वंगु चैत्यया न्हचोने च्वना दाफा भजन, नसंचा भजन मुनां भजनकीर्तन जुया च्वनी, गुगु थासय ज्ञानमाला भजनं नं जुया च्वनी ।

५) बुद्धपूजा

गुगु थासय बुद्ध मूर्ति प्रतिष्ठा जुया च्वनी, उगु थासय श्रद्धालु भक्तजनपिसं यथाशक्य पूजाभावभक्ति याना च्वनी ।

६) सद्धर्म पाठ

गुलिसियां बहा, बही अथवा थःगु छुयेंय च्वना जूसां सद्धर्म सूत्र - प्रज्ञापारमिता, दशभूमिश्वर, सद्धर्मपुण्डरीक, लंकावतार, तथागत गुह्यक, सुवर्णप्रभा एवं ललितविस्तर, गण्डव्यूह, पंचरक्षा, कारण्डव्यूह, गुणकारण्डव्यूह, बोधिचर्यावतार आदि धर्मग्रन्थ पाठ यायेगु जुया च्वनी ।

७) धारणी ब्वने

विहारय अथवा धर्मागार गुम्बास च्वना धर्मपासापिं मुंका यथाविधि अनुसारं आकाशधातु प्रणिधाननिसें शुभारम्भ याना आर्य भद्रचरी ब्वनां अपरिमिता धारणी आदि ब्वनेगु, ब्वंकेगु याइ ।

८) बोगी वनेगु

सुथ न्हापां दनां बुद्धगीत हाला थायथासय च्वंगु चैत्य स्थान अथवा विहार विहारय बुद्धगीत हाला चैत्य प्रदक्षिण यानां परिक्रमा याइ ।

९) श्रृङ्गमेरी/न्येक पुये

अतीत कालया राजा श्रृङ्गकेतुया धर्मपत्नी सुशीला महारानी नं गुगु प्रकारं न्येक पुया चैत्य भक्ति याना उद्धार जुया वन धैगु

अवदानया कथन अनुसारं धुगु कथं चैत्य भक्ति यायेगु असंख्य तःधंगु भालपा परम्परागत धौतक नं न्येकू पुया चीबहा चाःहुलेगु याना च्वन ।

१०) लः छायेगु

स्वयम्भू चैत्ययात थःथःपिंगु श्रद्धानिशचय अनुसार पुष्प, धूप, दीप आदि फलफूल, स्कन्द छगू लख प्रमाणं लाख धंक द्रहलपिंगु याइ । मेगु अर्थय लः पुँइ छायेगु धका देवीदेवताया मूर्तिस रंगारोहण यायेगु धया तःगु दु ।

११) लुचिद्यो थाये

“लक्ष्य चैत्य” निर्माण विधि अनुसार चैत्य चीबहा चिचीगः याना थासाय् थाना आपा संख्या दयेकेगु अर्थात् सवालाख धंकेगु प्रमाणं लुचिद्यो थायेगु, थाकेगु याइपिं नं दु ।

१२) छत्रारोहण

शुक्ल चैत्य, स्थूल चैत्य विशाल चैत्यप्रति श्रद्धाभक्तिपूर्वक छत्र चढे याइगु, “चौ” छायेगु, इलां प्यनेगु, थुकीया नं थःगु अलग विधि दु ।

१३) मयन् छत्रारोहण

छत्रारोहण विधि स्वया मयन् छत्रारोहण संक्षिप्तकरणया रूपय् “दीपयात्रा” मतयाः वनीबले सीयागु छत्रया रूपय् “सीस्वां” दयेका छायेगु चलन मदुगु मखु । थुकीया नं थःगु हे विधि दु ।

१४) यो अवसं

यो अवसं धैगु लच्छियंकं न्हिं छछः जक नया अवसं च्वनीगु खः । अप्पो याना यो अवसं च्वनीपिं स्वयम्भू, चोबहा, बुंग छेके वनीगु चलन दु ।

१५) न्यान्हु अवसं

गुंला लच्छिया दुने न्यान्हुइ छकः छकः याना अवसं च्वनीगु खः । थुकी नं अथेहे स्वयम्भू, चोबहा, बुंग छेके वनीगु चलन दु ।

१६) माय् अवसं

गुंला लच्छियंकं विहारया मूलदेवता क्वापाःजुयात नित्य स्नान याकीगु, देख्ये चायेकीगु, अभिषेक जल पालं याना च्वनी । तर थुमिसं मेमेगु छु हे अन्नवस्तु मनःसे निराहारं च्वना क्वाःपाजुया थासय् जक थातं च्वना च्वनी । उखेंथुखें गनं नं वनी मखु, वने नं मज्यू थुकीया नं थःगु इतिहास दु ।

१७) उपोषधव्रत

“उपोषधव्रत” धैगु अमोघपाश लोकेश्वरयागु उपासना आराधना याना अष्टमी व्रत धलं दनीगु खः । थुकीया नं थःगु हे विधि दु ।

१८) बहापुजा

खतु यलय् करीब निसःगु बहा दु । अथेनं यलया प्रमुख विहार “भिंच्यागु विहार” खः । उगु विहार विहारय् वनां थःथः परिवार समूह जक मुनां बहा पूजा वनीगु चलन दु । गुलिसियां धुगु पुण्य कार्यस त्वाः बहायापिं श्रद्धालु भक्तपिं मुंका वाद्यवादन सहित उल्लास उमंगपूर्वक पंजरां ज्वलं छाया बहापूजा वनी ।

१९) त्यागशील धर्म

मेमेगु ईलय् ब्यलय् त्यागशीलधर्म पालन याये मफुसां परन्तु गुंला लच्छि जक जूसां थःम्ह फुफुथें ला, न्यां, खें, अय्ला, ध्वं, बजां, चुरोट त्वःता च्वनी । गुलिसिनं छलकपट व लोभ बढे जुइगु, असत्य खं ल्हाये मालीगु ज्या बन्दब्यापार याये मखु धका धः, काता, तालाजु, अःभुतकं थीमखु धका अलग च्वनीपिं दु । अफ्र आमिष पदार्थ लभा, छा, प्याज तकनं मनइपिं दु । हानं गुलिसिनं सिंकि, गुन्दु, शाकिचा समेत नइ मखुपिं नं दु । अथे हे थः श्रीमति जूसां “गुंला लच्छिया छपाः लासाय् च्वने मखु” धका ब्रम्हचर्या शील पालन याइपिं नं मदुगु मखु । थः परिवार यात जूसां “छाक्क वचन” ल्हायेमखु धका मौन धारण याइपिं नं दु ।

२०. गुंलासेवा वने

गुंला लच्छिया तुतः खलः पासापिं मुनां सुथ न्हापां दनां चोबहा चेके वनां तुतः व बुद्धगीत हाला लच्छियकं चेके वनी । अथेहे बुंग व स्वयम्भू नं वनेगु चलन दु ।

२१. छेके वने

गुंला लच्छिया थःगु जीविकोपार्जनया ज्याखँ फुक्क हाकुतिना आम्दानी श्रोत तकं त्याग यांना न्हापनं दनां बागमती वनां थायथासय् प्रसिद्ध देवस्थलय् बान्हि स्वफः ईतक जूसां नये पित्यासां उखेथुके तातापाक जूसां छेके वना च्वनी ।

२२. गुंला लभा प्वलीमखु

गुंला लच्छिया दुने "ग्वःगु लभा चैत्यया आकार प्रकारलिसे मिलेजू" धका श्रद्धा आस्था तया लभा प्वली मखुपिं नं दु । अज्ज चीबहाया किचः तकं हाचाँ मगाइपिनं मदुगु मखु । दानं वनेच्वनेबले चीबहायात आदर तया जःपाखे लाका चीबहाचा दुला वनीपिं नं दु । चीबहाफले वसः पायेगु तकनं याये मज्यू धका आदर सम्मान तइपिं नं दु ।

२३. पञ्जाष्टि / यल पंजराँ

श्रावणशुक्ल अष्टमिकुन्हु थःगु विहार विहारय् अथवा छ्यैय् दीपंकर आदि बुद्ध बोधिसत्त्वपिंगु मूर्ति ब्वया धलंशालाथें फयांफच्छि बांलाका शोभावृद्धि यांना आगन्तुक भिक्षुसंघ - शाक्य, वज्जाचार्य, ब्रम्हचर्यभिक्षु, श्रामणेरक, चैलक आदि वन्देजुपिन्त विधिपूर्वक दान प्रदान जुया च्वनी । लिसें त्वाः, बहालय् दानगाथा ब्वंगु मधूर ध्वनी उच्चारण जुया च्वंगु सः ताये दया च्वनी । थुकुन्हु स्वतः व पिन्पाँ ज्वना वःगु उखेंथुखें खने दया च्वनी ।

२४) जा पूजा

पञ्जाष्टमि न्हयकुन्हु "दानदत्तगुथि" हःनी, माःमाथाय् विहार विहारय् बहीद्यो ब्वइगु थासय् "जा पूजा" धका छगू अलग थितिरिति हना च्वनी ।

२५) जुगः पञ्जराँ

श्रावण कृष्ण त्रयोदशिकुन्हु नं यल पञ्जाष्टमि थेंतुं दानप्रदानया चहलपहल उत्सव जुया च्वनी । थुगु प्रथा खास यांना यल देश बाहेक यँ, खप आदि गाँगामय् तकनं जुगः पंजराँ माने यांना च्वनी ।

२६) जुगःया स्वयम्भू छेके वने

ध्वहे जुगः पंजराँया दिनस स्वनिगःया श्रद्धालु भक्तजनपिं श्री स्वयम्भू धर्मधातु वागीश्वर स्थानस छेके वःपिं व पंजराँ दान काःवःपिंगु लस्कर आपालं हुलमुल जुयाच्वनी । थुकुन्हु यलया मतयाः खलः सकलें अनिवार्य रुपं छेके वयाच्वनी । थुकुन्हु स्वयम्भूया छगू तःधंगु पर्व धाःसां ज्यू ।

२७) नागपूजा

श्रावण शुक्ल पंचमिया दिनस वासुकी आदि नव नागराजपिंगु विशेष गुणयात लुमंका "नागपाश" नागचित्र च्वया लुखा फुसे तिकाः आदरपूर्वक पूजा सत्कार जुयाच्वनी । सर्वथा नागराजपिंगु प्रकोप शान्त जुया सदां शुभिक्ष मंगल जुया च्वनेमा धका कामना याइ ।

२८) पिन्पाँ थने

गुंलाया विशेष पर्व दिन अष्टमी, पुन्ही, संलूकुन्हु थःथःपिंगु बही विहारय् प्रतिष्ठापित दीपंकर आदि बुद्ध बोधिसत्त्वपिन्त थःथःगु गच्छे अनुसारं पिण्डपात्र थनेगु ज्या जुयाच्वनी । बुद्ध धर्मय् पिण्डपात्रया थःगु हे विशेष महत्त्व दयाच्वनी ।

२९) स्वन्तिइ नवबाजा थाये

दँय् छकः जुइगु मतयाः खलःकं गुंपुन्हि न्हयकुन्हु बहनी सदाशिव मृत्युञ्जय, स्वन्ति महाद्योया अग्रे च्वना नवबाजा थाःवनीगु चलन दु ।

३०) क्वाति त्वने

श्रावण शुक्ल पंचदशिकुन्हु ललिचा सहित गुता प्रकारया बूबः दायेका सुपथ्यगु नींगु भैषज्यया रुपय् क्वाति त्वनेगु छगू विशेष पर्व खः । ध्व क्वाति सेवन यानागुलिं स्वास्थ्यया नितिं आपालं हितकर जू धाइ ।

३१) सिसाबुसा दान

श्रावणकृष्ण प्रतिपदा-सापारुकुन्हु थःथःपिंगु त्वाः बहालय् च्वंपिं उपस्थित इष्टमित्र दाजुकिजा तताकेहें मस्तमिसापिन्त कयगु प्वया, तुसि, पासि, फाँसि आदि फलफूल दान बिइगु चलन दु ।

३२) साखःति त्वंके

मतया, बहापूजा वया च्वनीपिं भक्तजनपिंगु सेवा सुश्रुषा नितिं इमिगु स्वास्थ्ययात फाइदा जुइ धैगु मति नं सुं, पिपी, मले तथा साखःति त्वंकेगु याइ ।

३३) प्यंगः थूर काःवने

सम्राट अशोकं थःगु सम्बोधि यात्राया भवलय् लुम्बिनी बिज्यागु ईलय् श्री स्वयम्भू महाचैत्य दर्शनार्थ नेपाःया उपत्यकास बिज्याबले यल देयागु शान्त वातावरण खनां थुगु थाय्थात अति पवित्र भाःपा शाक्यमुनि बुद्धया शारिरीक, अस्थिधातु, सहित यानां थन प्यंगू दिशाय् प्यंगः थूर स्वनां थकूगु जुल । ध्वहे पवित्र स्तूप थूरप्रति श्रद्धाभक्ति तथा धौतक नं प्यंगः थूर प्रदक्षिणा याःवनेगु चलन जुया च्वन । ध्व यलया थःगुहे विशेषता खः ।

३४) धंजलियाः हिति स्वःवने

गुंपुन्ही सर्कुन्हु दीपावती नगर गुइतःया प्रथमोच्च श्री महाविहारस “धर्मञ्जय यात्रा प्रणालिका” धैगु धंजलियाः हिति स्वः वनेगु चलन दु ।

३५) प्याःपुखू छिये

लग्नख्यलं उत्तर पाखे च्वंगु बालार्चन देव संस्कारित “ज्येष्ठवर्ण महाविहार” तंगः बहाया ल्यूने पाखे लाना च्वंगु छगू ऐतिहासिक पुखू दु, व खः “प्रयाग पुखू” । थुगु पुखू छियेगु याना वया च्वंगु दु ।

३६) धर्मोपदेश न्यने

गुंला महिनां धर्म श्रवण यायेगु विशेष उत्तम धका करुणामयं नरक उद्धार याःगु खँ व “कर्मविपाक निर्देशन कर्मफल” खँ कना तःगु गुणकारण्डब्यूह बाखँ कंकेगु न्यनेगु चलन दु । लिसें मेमेगु धर्म ग्रन्थया व्याख्या याकेगु नं याः ।

३७) यमद्वार दर्शन

नरकोद्धारक “श्री जटाधारी लोकेश्वर” धर्मराज बिज्याना च्वंगु तंगः बहाया ल्यूनेसं च्वंगु यमद्वार दर्शन व पूजन यायेगु चलन दु । ध्वया न्हघोनेसं च्वना सीपिनिगु नामं मत छवयेकः वनेगु चलन दु ।

३८) सीपिनिगु नामं मत छवयेकःवने

थुगु वर्षय् थः परिवारया सुनं दिवंगत जुल धाःसा इमिगु नामं “दुर्गतिमोचन” जुइमा धैगु कामना यानां तंगः बहालय् च्वंगु यमद्वारया न्हघोनेसं च्वनां सच्छि च्याप्वाः मत छवयेकिगु चलन दु ।

३९) चीबहा चाः हुले

गुंलाधर्म आरम्भ जुसानिसें गुंला धर्म समाप्त मजुतले छन्हु हे भित्ते मजुइक निरन्तर रुपं सुथ न्हापां दनां चीबहाया छचालं बै पुना सुगधर सफा यानां, चीबहालय् नीलखं लुनां यंचुसेपिचुसे च्वंक सिला, न्गु कापतं हुया, चिकं नं इलाः, बाँलाके धुनेवं यथाश्रद्धा धू धुपाय् च्याका, चाकःमत छवयेका भिं भिंगु बांलाःगु स्वांमालं क्वखायेका चीबहाया सेवा याना च्वनी । लिसें थःगु अधिष्ठान कथं “रत्नकेतु धारणी” ब्वना नीछकः अथवा सच्छि च्याकः चैत्य प्रदक्षिणा याइपिं नं मवुगु मखु ।

४०. चीबहा न्हयोने दण्डवत्

गुलिसियां चीबहा चाःहुलेथेंतुं थःगु अधिष्ठान कथं पञ्चाङ्ग
प्रणाम अथवा अष्टाङ्ग प्रणाम याना म्हधू दाइपिं नं दु ।

४१. स्वांताजि छाये

स्वयम्भू चैत्ययागु गुणानुस्मरण याना थःथःगु त्वाः, बहालय्
च्वंगु चैत्य चीबहा आदिस भक्तिपूर्वक बांलाःगु भिंगु स्वांया प्रकारान्तर
उखेंथुखें मालाः हया स्वां छप्वः छप्वः जक छाया जूसां भक्ति याइपिं नं
मदुगु मखु । खतु थुगु स्वां द्रहलयीबले पुष्पकेतु धारणी ब्वनेगु नं चलन
दु । प्रसंगवस् थुथास स्वांया विशेष महत्व खँ न्हयब्वया च्वना । गथे-

१. उप्व स्वांनं	विद्या बिइ
२. चँ स्वांनं	काम बिइ
३. जी स्वांनं	भाग्य बिइ
४. केशर स्वांनं	रूप बिइ
५. दाफ स्वांनं	सुख बिइ
६. चम्पा स्वांनं	शत्रु नाश जुइ
७. नागपुष्प स्वांनं	शत्रु परास्त जुइ
८. कमल स्वांनं	लक्ष्मी बिइ
९. कुशेशय स्वांनं	ऐश्वर्य बिइ
१०. हचार्डपले स्वांनं	लक्ष्मी उदय जुइ
११. पले स्वांनं	श्रीवृद्धि जुइ
१२. रूपकेशरी स्वांनं	शुभलाभ जुइ
१३. पुंनाम स्वांनं	शान्ति जुइ
१४. पारिजात स्वांनं	शत्रु नाश जुइ
१५. पारिभद्र स्वांनं	आयु वृद्धि जुइ
१६. अवराजि स्वांनं	विद्या लाभ जुइ

१७. करवीर स्वांनं	मोक्ष लाभ जुइ
१८. अश्वय स्वांनं	शोक हरण जुइ
१९. कुशुम स्वांनं	वस्त्र लाभ जुइ
२०. कैतकी स्वांनं	मोक्ष बिइ
२१. महासुगु करवीर स्वांनं	रत्न लाभ जुइ
२२. बधू स्वांनं	वस्तु उपलब्ध जुइ
२३. जिप्पः स्वांनं	मोक्ष बिइ
२४. पातली स्वांनं	पुष्टि जुइ
२५. अल्लिका स्वांनं	अन्न लाभ जुइ
२६. कोबिदार स्वांनं	शान्ति जुइ
२७. मधु स्वांनं	मधुवस्तु बिइ
२८. लुंगजू स्वांनं	सुगन्ध प्राप्त जुइ
२९. काशिक स्वांनं	काशि वस्त्र लाभ जुइ
३०. करञ्ज स्वांनं	कलह शान्त जुइ
३१. किशुक स्वांनं	उत्तम वस्त्र लाभ जुइ
३२. करणिका स्वांनं	रत्न लाभ जुइ

थुगु स्वांताजिया पुण्य प्रशंसा स्वयम्भू पुराणय् उल्लेख याना तःगु दु ।

४२) सख्वाः पाये

थुगु सख्वाः पायेगुया थःगुहे महत्व 'सुधालेपन विधि' पुस्तकस
च्वया तःगु दु । चीबहा चैत्य आदिस भक्तिपूर्वक संख्वाल पायेगु यानां
चैत्यया शोभावृद्धि यानां सेवा यायेगु नं चलन दु । खतु सख्वाल पायेगु
विशेष पर्व दिन कतिपुन्हिकुन्हु सकभनं यानां वया च्वंगु खनेदु ।

४३) चाकःबलु मत छवयेके

गुलाया विशेष पर्व दिनस चैत्यया छ्वाल चाकःबलु मत
छवयेकेगु चलन दु ।

४४) पादार्घ्य बिये

गुलिं भक्तजनपिसं पंचबुद्ध श्री स्वयम्भू चैत्यया चरणकमल
"पादुका" लुमंका पंचरत्न अर्घ सामाग्री समेत तथा निर्मल तीर्थजल
सहित याना स्वस्ति वाक्य ब्वंका नीछकः अथवा सच्छि च्याकः पादार्घ्य
द्वहलपिड । अले ध्वहे पादार्घ्य जल अभिषेक कायेगु बियेगु चलन दु ।

४५) मतयाः वने

श्रावण कृष्ण द्वितीयाकुन्हु यलया सम्पूर्ण बहा, बही, कच्चाबहा
व मेगु ननि, चुक, गःली, लाछि, लिबि, क्यब आदि स्थानस च्वंगु बुद्ध
बोधिसत्त्व व चीबहा, धर्मधातु, वज्रधातु दर्शन व पूजन नितिं दीप-
यात्राया रुपय मतयाः वनेगु चलन दु । थुगु मतयाःया भवलय् ब्रलंद्रो
भक्तजन यावुत समावेश जुया च्वनी । थुगु मतयाः वनेगुया नीतिनियम
थितिरिति थःगुहे ढंगं वाद्यवादन सहित न्हयाना च्वनी । थन उगु
मतयाःया संक्षिप्त गतिविधि उल्लेख याना च्वना । "दीपयात्रा" मतयाः
लय् उपस्थित जुइपिं विशाल जनसमूहया क्रम व श्रद्धालु भक्तजनपिसं
थःथःगु मनोवाञ्छा अनुसारं छाइगु श्रद्धाया उपहार वस्तु थथे खनेदु -

१. सर्वप्रथम गुरु वज्राचार्य छगू समूह न्हयोने च्वना वइ । उगु
समूहलय् मार्ग निर्देशकया रुपय मतयाःया कमाकन्ध स्पूपिं गुरुजु
न्हापालाक च्वनी ।
२. ध्वयां ल्यू धारामण्डल थिला वइ ।
३. लियांल्यू प्वतासं च्वया वइ ।
४. धूप मकः ज्वना अष्ट सुगन्ध धूप थना वइ ।
५. अनंलि पञ्चोपचार पूजा सहित यानां क्वतः ज्वना पूजा याइ ।
६. ध्वयां ल्यू चौछत्र व ध्वार्यं छाया वइ ।
७. ध्वयां ल्यू वस्त्रया रुपय जजंका छाया वइ ।
८. ध्वयां ल्यू चामर उखेरं गाला वइ ।
९. अले थनंलि मुनिवर वचनया सन्देश कथं वज्रघण्ट थाना वइ ।

१०. ध्वयां ल्यू अष्टाङ्ग प्रमाणया रुपय म्हधू दाना वइ ।

११. ध्वयां ल्यू बुद्धप्रति महान स्वागत सत्कार नितिं जूगु लुम्बिनी वनस
बुद्ध जात्राया प्रतीकया संस्मरण कथं जुया वंगु छगू उदाहरण
स्वरूप थथे ज्याभवः न्ह्याकी । गथे -

१२. ब्रम्हाया प्रतिनिधि कथं तुफि छाया वइ ।

१३. विष्णुया प्रतिनिधि कथं शंख पुया वइ ।

१४. महादेवया प्रतिनिधि कथं डमरु थाना वइ ।

१५. इन्द्रया प्रतिनिधि कथं चौछत्र छाया वइ ।

१६. यमराजया प्रतिनिधि कथं सर्पदण्डी ज्वना वइ ।

१७. वरुणया प्रतिनिधि कथं जलधारा हायेका वइ ।

१८. अग्नि देवया प्रतिनिधि कथं धूपमकः ज्वना वइ ।

१९. वायुदेवया प्रतिनिधि कथं ध्वार्यं छाया वइ ।

२०. कुवेरया प्रतिनिधि कथं पंचरत्न व दक्षिणा छाया वइ ।

२१. सरस्वतीया प्रतिनिधि कथं बसाः कापः छाया वइ ।

२२. भिक्षुया प्रतिनिधि कथं चामर उखेरं गाला वइ ।

२३. गन्धर्व किन्नरया प्रतिनिधि कथं बाजं थानां प्याखं हुला म्ये हाला
वइ ।

२४. देवकन्याया प्रतिनिधि कथं ताय् अबिर ह्वला वइ ।

२५. अनाथपिण्डकया प्रतिनिधि कथं पिण्डपात्र द्वहलपा वइ ।

२६. सुजाताया प्रतिनिधि कथं क्षीरपात्र छाया वइ ।

२७. पृथ्वीमाताया प्रतिनिधि कथं निसलापाः छाया वइ ।

२८. नागकन्या जलकन्याया प्रतिनिधि कथं भारी व शंख ज्वना अर्घ
बिया वया च्वनी ।

२९. चन्द्र सूर्यया प्रतिनिधि कथं सुगन्ध दीप कपूमत च्याका वइ ।

३०. नमुचिपरिवारया प्रतिनिधि कथं पंचस्कन्ध विनाशया रुपय पंचज्ञान
स्वरूप पंचसूत्र इताः मत बिया वया च्वनी ।

३१. आरोग्य प्रदानया रूप्य ग्वलः, हलः, विहलः, अम्बः छाया वइ ।
 ३२. अमृतपानया रूप्य साखःति लुना वया च्वनी ।
 ३३. धर्माकर माकःया सेवाया रूप्य किंशुक वनजात फलमूल छाया वइ ।
 ३४. भक्तजनपिसं गुणकीर्तनया रूप्य पत्र पत्रिका पुस्तिका छाया वइ ।
 ३५. भजनकीर्तनया रूप्य विविध बाजं खलः वया च्वनी ।
 ३६. भोजनया रूप्य भव्यब्ब, महीब्ब छाया वया च्वनी ।
 ३७. मुखशुद्धिया रूप्य मसला, ग्वाः ग्वय् छाया वइ ।
 ३८. सिद्धमहीया रूप्य निसलामही छाया वइ ।
 ३९. मार विजयया रूप्य विविध पुष्पया आकार प्रकारगु ह्वः फ्याना तःगु मतयाःमही छाया वइ ।
 ४०. भक्तजनपिसं पञ्जरौज्वलं अष्टमाङ्गलिक उपहार वस्तु छाया वइ ।
 ४१. मतयाःखलःया प्रमुख दानपति कजीनं मतयाःया ज्याभवः क्वचाल धैगु अर्थय् तःप्वाःगु वहयागु दिवा ज्वना विधिपूर्वक अर्घ बिया सुसम्पन्न याइ ।

४६) बाजं वने

मतयाःया "दीपजात्रा" सम्पन्न जूगु लसताय् थःथःगु विहार विहारं हर्ष उल्लासपूर्वक पुण्यानुमोदनया रूप्य बाजं खलःत वया मतयाः विसर्जन जुल धैगु सन्चोदना ब्यू वया च्वनी ।

४७. दमखिं बाजा चाःहिले

बुद्धया न्हातिकाया रश्मिं अभिनिष्क्रमण जूपिं दशक्रोध भैरवया प्रतिनिधि स्वरुपं जुया पिहां वःमहं भैरव व ध्वया शक्ति काली व महालक्ष्मी जःखः तया सम्पूर्ण मार दमन नितिं प्रकट जूमह भैरवं सिंहनिरनादया सन्देश न्यंकूगु शब्द खः - "भ्यांजक भ्यादम फट् निफ दम्, दम् फ फ दम्, दभ्यां दम् भ्यां दम् भ्यां" थुगु मन्त्रोच्चारणया तात्पर्य आश्रयं ध्व भाव स्पष्ट याःगु दु कि - "सम्पूर्ण क्लेशमार उत्पत्ति

स्थान अज्ञान व क्लेश थुगु निगू पक्षयात समूल विच्छेद याना हूँ फट् याये थुक्कम्ह वसपोल बुद्ध भगवानयात अभिवादन व्यक्त याना च्वंगु" धैगु अर्थ जुल ।

थुगु दमखिं बाजा बोगी व मतयाःया प्रमुख बाजा माने याना वया च्वंगु जुल । थुगु बाजाया सहायक परिचारिक खः "नवबाजा" । ध्वहे नवबाजा मंगः लाय्कूया लुंभ्याः क्वसं अनिवार्य रुपं थायेगु याना वया च्वंगु दु । खतु धाःबाजा व दमखिं बाजां त्वाःया दबू दबूपतिं वना न सन्देश न्यंक वनां च्वंगु दु । ध्व छगू परम्परा नेपाःया थःगु हे विशेषता दया च्वंगु महत्वपूर्णगु प्रदर्शनी खः ।

४८. लुं सफु दर्शन

बुद्धोपदेशित चयप्यटोल धर्मस्कन्धया सारभूतगु "प्रज्ञातत्त्व" उच्चकोटी दर्शन ज्ञानया मूल तत्त्व विषय सविस्तर वर्णन जुया च्वंगु "प्रज्ञापारमिता" सफु खः । अतिकं महत्वपूर्ण दर्शनीय, श्रवणीय, स्मरणीय, चिन्तनीय, मननयोग्य दर्शन शास्त्र प्रज्ञापारमिता अतीव श्रद्धा गौरव तया पूजा सत्कार याये योग्यगु खः । विशेषं थुगु पुस्तक सिंहकल्प नगर धालसां प्रज्ञापुत्री महानगरया प्रमुख विहार थंबहीया सफु लुंया मसिं रञ्जना लिपिं च्वया तःगु नीलपत्र सतसहस्रिका प्रज्ञापारमिता दर्शन याः वनेगु परम्परा दु । थुगु ग्रन्थ महायान बौद्ध जगतय् अतिकं प्रसिद्धगु ऐतिहासिक सद्धर्म ग्रन्थया रूप्य सम्मान याना वया च्वंगु खः । खतु थुगु अमूल्य ग्रन्थ गुरु महामंजुश्री नं च्वया तःगु खः धैगु परम्परागत जनविश्वास दया च्वंगु जुल । तर थुकी प्रारम्भिक स्वंगू पेज जक मंजुश्री गुरुं च्वया तःगु धाइ । मेगु ब्याक्को पण्डित जिनश्रीज्ञानजुं अति परिश्रम यानां ने.सं. ३४४ सालं सम्पूर्ण याना तया तःगु खः ।

४९. लुं ज्या याये

मतयाः, बहापूजा वनीपिनिगु नितिं सुख सुविधाया लागि बहा, बही, ननी, चुक, गःली, क्यबस प्रतिष्ठापित चैत्य चीबहाया जःखः च्वंगु

लै स्यनां च्वंगु, पःखा आदि दुनां च्वंगु मर्मत कार्य जुया च्वनी । लिसें दुर्गन्ध फोहर सुचुपिचु यायेगु ज्याय् फुम्हं फूगु चाःगु हारगुहार याना सुधार कार्य सम्पन्न याइ ।

५०. तिसा सिलेज्या याये

गुंला महीनां अप्पो श्रद्धालु भक्तजनपिं वया स्ववइगु जुया नितिं द्यो द्योपिनिगु अलंकार तिलहिल फोहरमैला सफा याये नितिं तिसा सिलेज्या जुया च्वनी ।

५१. लः पुई छाये

द्योया काष्ठमूर्ति, मृतिकामूर्तिस रंगरोगन याना बाँलाकातःगु मूर्ति स्यनां च्वंगु अथवा रंग ब्वला च्वंगु भिकेया नितिं रंगारोहन विधि कथं नवजीव दान यायेथें बाँलाकेगु ज्या जुइ ।

५२. पंजराँ द्यो

विहार विहारय् च्वपिं अथवा पंजराँ गुथिया सम्येद्यो कुर्यापांजु, चकँद्यो, दीपंकर बुद्ध व अन्य मेमेपिं ताराखः द्योपिं यथायोग्य प्रमाणं द्यो ब्वया लिसें इलाँ पौभा समेत तया पंजाष्टमि न्हचकुन्हु हे आदर सम्मानपूर्वक ब्वया तइ । लिसें ध्वया न्हचोनेसं जाभु नं न्हचच्याका तइगु चलन दु । ध्वया गुथिहारपिनि पाठ याकेगु नं चलन दु ।

५३. फूद्यो आजु चाःहुइके

“फूद्यो आजु” नं दीपंकरया रुपय् माने याना तःगु दु । तर थुगु मूर्ति मेमेगु बही विहारय् दइमखु केवल रुद्रवर्ण महाविहार, उकुबहालय् जक दु । थुगु मूर्ति यल पंजाष्टमि छन्हु जकया लागि पिहाँ बिज्याइ । गुलि नं पंजाष्टमिया दानदत्तगुथि चले जुया च्वनी, उगु थासय् थुम्ह फूद्यो आजु यंका दान बिइकेगु चलन दु । वसपोल फूद्यो आजु दकले लिपा दान काःवनीम्ह जुया थुम्ह द्योयात फूद्यो आजु धायेगु चलन दुगु खः ।

५४. बुद्धवाः द्येके वने

गुंला लच्छिया न्याकः बुद्धवार चूलाइ । उकुन्हु बौद्धपुरी बदेगांया “बुद्धवाः द्यो” द्येके वनेगु याइ । धन हे मतयाःया सम्पूर्ण भक्तजनपिं द्येके वनेगु नं चलन दु ।

५५. गुइतः नकींजु स्वः वने

गुइतलय् छम्ह अति श्रद्धावानम्ह बहुत दुःखकष्ट सियाच्वम्ह सर्वानन्द राजाया सम्यक् पंजराँ याःबले त्वःपः वःम्ह छम्ह नकींजु दुगु खः, वयागु लुमन्ति कथं दयेकातःम्ह पुलाम्ह नकींजु स्वःवनेगु चलन दु ।

५६. गुइतलय् न्हापां पंजराँ फयेगु

उम्ह गुइतः नकींजुयागु नामं बिया वया च्वंगु दानदत्त दकले न्हापां दान फःवनेगु चलन दु । तर थुम्ह नकींजुयागु श्रद्धार्पण दानदत्त छु मनसे दान कावनेमाः धैगु नं छगू परम्परा अनुश्रुति चलेजू ।

५७. पताः छाये

गुंलाया विशेष पुण्यतिथिस विहारया देगलय् बहिया पुलनिसें शोभायमान जुइक पताः छायेगु याइ । लिसें छत्र, ध्वज, पताक, इलाँ, आवि ब्रह्मलपीगु नं चलन दु ।

५८. महादी ग्वराधी स्वनी

गुंला धर्म प्रारम्भ जुइवं अथवा बहीद्यो ब्वयेवं “ग्वराधी” खः ग्वया “ग्वराधी, महादी मत” च्याकेगु नं चलन मदुगु मखु ।

५९. दान गुथि हने

पंजाष्टमि व जुगः पंजराँया दिनस दानदत्त गुथि कजी अथवा थुवाः गुथिहारपिंगु थःथःगु छघैक्वसं अथवा सतः, फले, दीगी, चपाःया क्वसं च्वना थः पुर्खापिनिगु दानदत्त गुथि लोप मजुइमा धैगु मत्ती नं यथाश्रद्धा चत नं छतु जक जुसां दान बिया च्वनी ।

६०. सत्तु ग्वःजा दान

सत्तुचूर्ण, नैक्या, छोहरा, सुकुमेल, घ्यो, कस्ति, साखः ल्वाक छ्याना न्हाया सत्तुग्वःजा दयेकातःगु गुंलाया लसताय् दान बिइगु चलन दु ।

६१. जीगः बिइगु

बहीद्यो ब्वइपिं गुथिहारपिसं थःथःपिनि बहीद्यो ब्वयेधुंका पूजा याये धुनेवं बहीद्यो ब्वयेया लसताय् आगन्तुक उपस्थिति जनपिन्त सम्हय्बजि दान बिइगु चलन दु ।

६२. सुचिनिचि याये

गुंला आरम्भ दिननिसें समाप्त मजुतले न्हिन्हिं सुथ न्हापां दनालि थःथःगु छ्येया पिखालखुनिसें सिखलं हाहा याना बं थिलेगु नं चलन दु । थुकीं यानां छ्येयें शुद्ध पवित्र जुल भाःपिइ ।

६४. निसला ब्वये

गुंलाया अन्तिम दिनस थःथःगु विहारया मूल देवता क्वाःपाःजु गन्धूरी देवता व सम्यक् देवताया अग्रे निसलापाः ब्वये यंकी अथवा विहारया स्थविर आजुपिं व गुरु वज्राचार्यपिन्त निसला दान बिइ ।

६४. धर्मपासा म्हिते

धंजलियाःया दिनस फलफूल दान बिइगु ईलय् “अवदय” थुगु प्यंगः आखः अंकीतगु गट्टा ह्वाना थःथःपिनिगु दिनदशा अथवा कर्मविपाक फल छु छु खः धैगु भविष्य लक्षण अनागत सन्देश सीकेगु नितिं धर्मपासा म्हितेगु याइ ।

६५. बहीद्यो स्वः वने

नेवाः बौद्ध संस्कृति कथं बही विहारय् प्रदर्शन जुइगु मूर्ति, चित्रकला, पौभा, चीबहा, साधिक वस्तु, पूजाया हलंज्वलं एवं विविध

प्राचीन लिपि अंकीत सूत्र, तन्त्र ग्रन्थ तथा महत्वपूर्ण कलात्मक दुर्लभ वस्तु सलंसारय् तथा ब्वया तथा तःगु त्रिरत्नालोक पुण्यकीर्ति स्वःवनेगु चलन दु । उगु पवित्र प्रदर्शित धार्मिक कलात्मक वस्तु दर्शन स्पर्शन चिन्तन मनन यानागुद्वारा प्राप्त जुगु पुण्यानुभावं सद्धर्म चेतना जागृति जुइ धैगु परम्परागत जनविश्वास दु ।

६६. गुंलाया गुबही स्वःवने

गुंलाया विशेष पर्व दिनस केवल छगू निगू स्वंगू बहीजक स्वःवना पर्याप्त मजू, परन्तु “गुंलाया गुंगू बही स्वःवनेमाः” धका धाइ । गुबही स्वःवनेगु विषययात कया छगू लोकोक्ति प्रसिद्ध जुया च्वंगु दु व छु धाःसा -

“गुजु वसः पुनां, गुपाता सिन्ह तिनां, गुछाः नया, गुताबीबःया क्वाति त्वनां, गुंगू धर्म पुथि स्वया, गुंलापर्व दिन लाका गुता बाजंया सः न्यनां, गुंगू भाव लुमंका गुबही स्वःवने” धैगु ध्व नेवाः बौद्ध संस्कृतिया थःगु हे विशेषता दया च्वंगु महत्वपूर्ण व प्रसिद्धगु उखान खः । थुजाःगु गौरवमय उखान बखान अन्तर्राष्ट्रिय बौद्ध जगतय् गनं नं वइ मखु । थुकीया रहस्य छु खः ? धैगु अनुसन्धान कार्य बांकी हे दिन ।

भीसं न्यनां तयागु अनुसार गुबहीया नां थथे खः -

१. गुइतः बही	पद्मोच्चश्री महाविहार
२. ई बही	सुजातप्रभ महाविहार
३. ब्वन्ति बही	ललितवन महाविहार
४. धपगाः बही	मणिमण्डप महाविहार
५. उबहा बही	जशश्री महाविहार
६. चिकं बही	सप्तपुर महाविहार
७. इखाछ्ये बही	गोपिचन्द्र महाविहार
८. नः बही	लोककीर्ति महाविहार
९. न्हागल बही	सुरश्चन्द्र महाविहार

नापं इवाः बही-राजश्री महाविहार व ज्याबहा बही-ज्येष्ठवर्ण
महाविहारय नं स्वः वनेगु याः ।

६७. अमोघपाश लोकेश्वर दर्शन

गुंलां बहीघो स्वःवनेबले प्रदर्शित बहीघोया भवलय भीस
न्हापालाक दर्शन याये माःम्ह प्रमुख देवता खः- "श्री अमोघपाश
लोकेश्वर" । ध्वहे लोकेश्वर प्रदर्शित मूर्ति मध्ये कलात्मक एवं
भव्यमूर्तिया रुपय खना च्वनी । ध्वया हे जःखः आर्यतारा व भुकुटीतारा
निम्ह अनिवार्य रुपं ब्वया तइगु जुल । खास याना बहीघो स्वःवनेबले
"अमोघपाश लोकेश्वर अनिवार्य रुपं दर्शन यायेमाः" धका धाह ।

उकीं हे जुइ बही पतिकं थुगु मूर्तियात विपेश स्थान प्रदान
याना तया तःगु खनेदु । थुकीया छगू विशेष कारण दु व छु धाःसा छन्हु
अवश्य भीपिं देहान्त जुया वनीबले गुलिनं थःम्ह याना तयागु कुशल
अकुशल धर्मपाप गुलि गथे दु धका यमलोकय जन्मराज चित्रगुप्तं
कर्मविपाक फलया बहिखातास कर्मलेखा छु गुलि गथे दु धका स्वइबले
उथाय सर्वप्रथम भीके ध्व खं न्यनी कि - "छिमिसं बही विहारय बना
श्री अमोघपाश लोकेश्वर दर्शन याना वयागु दुला ?" धका प्रश्न याइगु
जुया च्वन । थुगु प्रश्न पाखें भुक्त जुइया लागि बही विहारय
अमोघपाश लोकेश्वरया मूर्ति अनिवार्य रुपं प्रतिष्ठा याना तया तःगु खः
धका परम्परा अनुश्रुति दया च्वंगु जुल ।

६८. गुंलाया लसता

गुंलायें जाःगु प्रसिद्धगु धर्म लाभ महीना गुंला धर्मया लसताय
छुं छगू धर्मकीर्ति विहारावश्यकिय वस्तु द्दहलपिगु याइ, गथे शिलांकूश,
पिन्पां, किकीपा, दिवा, पूजाभः, इलां, छत्र, ध्वज, चामर, उखेर, मटुक,
पैंथिकुन्हः, कर्मपताः, हचेगा आदि द्दहलपिगु याइ । गुलिसियां
नामसंगीति खलः, तुतः खलः, भजन खलः, धारणी खलः व पाठ याइपिं
एवं छत्रंकू आदि गुरु वज्राचार्य तथा गरीब गुरुवा, अनाथ बालवृद्ध व
ल्वगिजनपिन्त फुम्हं फुत्थें नकेत्वंकं याना सेवा प्रस्तुत याना च्वनी ।

६९. गुंला भाकल

गुंला धर्मयें जाःगु प्रसिद्ध महीनास थःगु भाकल अनुसार
धर्मगोष्ठी पासापिं मुंका गुलिसिनं नवखण्ड, लक्षावति, पंचरक्षा आदि
पाठ याकी । गुलिसियां सहस्रावर्त पूजा, तारा धर्म याकी । गुलिसियां
धारणी ब्वंकी । गुलिसियां भजन याकी । गुलिसियां स्यंलहों ज्या याकी ।
गुलिसियां थः पुर्खापिनिगु सालिक स्थापना आदि धर्मकार्य जुया च्वनी ।

७०. ब्यां जा नके

अतीत कालय जुया वंगु छगू उल्लेखनीय घटनायात लुमंका
गुन्हुपुन्हीकुन्हु ब्यांयात जा नकेगु धका थायथासय ब्यां जाब्व तये
यंकेगु चलन दु । छम्ह साधारणम्ह पशु जुसां वयागु विशेष गुणयात
लुमंका हार्दिक कृतज्ञता रुपय ब्यां जाब्व तयेगु याना वया च्वंगु खः ।

७१. ईताः मत बिया

मतयाः वनीबले श्रद्धालु भक्तजनपिसं "ईताः मत च्याका
मतयाः वनेगु उत्तम" धका भालपा ईताः मत बिया वनी । गुलिं
गुलिसिनं न्याताजि ऊनया पंचसूत्रकाया ईताः मत बिया मतयाः वने
धुंकल कि उम्ह भक्त हानं ईताः मत बिया मतयाः वने मजिल धका
लिपालिपा गुबलें ईताः मत बिया मतयाःवनी मखुत । थुकी थःगु हे
रहस्य सुला च्वंगु दु ।

७२. सच्छि च्याप्वाः मत बिया वने

ध्व हे मतयाःया भवलय गुलिं गुलिं श्रद्धालु भक्तजनपिसं सच्छि
व च्यागू धर्मालोकमुख परिवर्तया संस्मरण कथं सच्छि च्याप्वाः ध्योदेवा
छाया मतयाः वनेगु नं चलन दु ।

७३. ल्हा पिन्पां थने

गुंलाया उपलक्ष्यय थःगु विहारया प्रमुख देवता क्वापाःजु एवं
गन्धूरी देवतापिनिगु ल्हाती च्वंगु पिण्डपात्रय पिन्पां थनेगु याइ । श्री

स्वयम्भू भगवानया ल्हा पिन्पां थनीपिं भक्तजनपिं नं उतिकं दया हे च्वनी । प्रसंगवश स्वयम्भूया कर्मराज विहारया गुम्बास बिज्याका तःम्ह शाक्यमुनि बुद्धया ल्हाती च्वंगु पिण्डपात्र थनेगु नं याइपिं मदुगु मखु । थुगु पिण्डपां नेपाल अधिराज्यया दकले तःग्वगु जुइफु । थुगु पिण्डपात्रय् छमुरी व भिफा जाकि न्हयं धाइ ।

७४. स्वयम्भूया पिन्पां जात्रा

गुबले सम्यक् नरां पंजरां जुइ, उगु उपलक्ष्यय् स्वयम्भूया प्रतिनिधि कथं पिण्डपात्र खतय् तया जात्रा याइ ।

७५. अमिताभ जात्रा

बौद्धपुरी बदेगामय् जुगःया दिनस खतस तया अमिताभ बुद्धया जात्रा जुइ ।

७६. वज्रयोगिनी जात्रा

जुगःया दिनस फम्पिया श्री वज्रयोगिनीया यात्रा जुइ ।

७७. न्याम्ह दीपंकर जात्रा

ख्वपया प्रसिद्ध अजाजुदेव “श्री दीपंकर बुद्ध” सम्येद्यो न्याम्ह भवःलाक च्वना जुगःया दिनस चंक्रमणया रुपय् जात्रा जुइ ।

७८. बिमांखः स्वये

इबाः बहीया संलसालय् तया ब्वया क्यना तःगु स्वर्गया बिमांखःया रुपय् कलात्मक काष्ठमय विमान स्वःवने ।

७९. षटांजु स्वये

ई बही संस्थापक बौद्ध विद्वान माध्यमिक दर्शनया आचार्य शून्य श्री मिश्र षटांजुया भव्य मूर्ति दर्शन व स्पर्शन याःवनेगु चलन दु ।

८०. तःग्व जाकि स्वये

इखाछयेंया दुन्तु बही पिन्तु बहीस ब्वया तःगु सत्य जुगया जाकि “तःग्व जाकि, चीग्वः जाकि” स्वः वने ।

८१. तेइमाछ्वाः स्वये

नदीसंगम विहार खुसि बहीली ब्वया तःगु अद्भुत आकारगु “तेइमा छ्वापाः” स्वःवने ।

८२. सिंहसार्थबाहु तुलांपौ

विक्रमशील महाविहार थंबहीली सिंहकल्प नगर संस्थापक सिंहसार्थबाहुया जीवनी च्वया तया तःगु तुलांपौ स्वःवने ।

८३. केशचन्द्रया तुलांपौ

पारावर्त महाविहार इतुं बहाया संस्थापक केशचन्द्रजुया चित्रमय जीवनी उल्लेख याना तःगु तुलांपौ स्वःवने ।

८४. शृङ्गकेतुया तुलांपौ

वज्रकीर्ति महाविहार ओम्बहालस ब्वया तःगु शृङ्गकेतु राजाया जीवनी कथा उल्लेख जुया च्वंगु तुलांपौ स्वःवने ।

८५. स्वनिगःया तुलांपौ

हिरण्यवर्ण महाविहार स्वाबहाया वत्तातलेया भवलय् ब्वया तया तःगु स्वनिगःया ऐतिहासिक स्थल अंकित याना तःगु कलात्मक चित्र तुलांपौ स्वःवने ।

८६. षटांजुया महाचीन यात्रा तुलांपौ

यम्पि महाविहार ई बहीया संस्थापक शून्यश्री मिश्र षटांजु बुद्ध धर्म अध्ययनार्थ सुदुर उत्तरापन्थ महाचीन व पोतला ल्हासा बिज्याना लिहाँ वःगु घटनाक्रम च्वया तःगु चित्रात्मक तुलांपौ स्वःवने ।

८७. जुजु सर्वानन्दया तुलांपौ

दिपावती नगर गुईतलय् जुया वंगु अतीत घटनायात लुमंका जुजु सर्वानन्द दीपंकर तथागतयात बिज्याका सम्यक् पंजरां न्याय्कूगु सविस्तर वर्णन अंकित याना तःगु चित्रमय तुलांपौ स्वःवने ।

८८. स्वनिगः ओलाया तुलापौ

रत्नाकर महाविहार, हः बहाया समृद्धवन्त श्रद्धालु दानपति बेखाराज वज्राचार्यजुया स्वनिगःया सम्पूर्ण चैत्य चाहुला चैत्य प्रतिष्ठा याना ओला न्यायकूगु सविस्तर वर्णन सहितगु तुलापौ स्वःवने ।

८९. बुद्ध जीवनी क्वताःपौ

लोकाकीर्ति महाविहार नःबहीया प्रवेशद्वारया फुसे च्वंगु वरन्दाया क्वताःपौती अंकित याना तया तःगु कलात्मक काष्ठमय बुद्ध जीवनी किया तःगु क्वताः पौ स्वःवने ।

९०. कर्मविपाक तुलापौ

यम्मि महाविहार, ई बहीली ब्वया तःगु चित्रमय कर्मविपाक फल निर्देशन याना क्यना तःगु तुलापौ स्वःवने । थुकी बही विहारय याये मज्जुगु अकर्तव्य निषेधकर्म यानागुया प्रतिफल कर्मभोग याइगु सास्ति याना दुःख कष्ट बिया तःगु कर्मभोग फल क्यना तःगु दु ।

९१. नेपाःया जुजु म्हासिके पौभा

हचेन्दु बहालय ब्वया तइगु नेपाःया ईलय ब्यलय जुयावपि राजा महाराजापिनिगु चित्र अंकित याना तया तःगु पौभा खः । थुकी दुने थये अंकित जुया च्वंगु खनेदु -

“मंजुश्रीकृत रम्यभूमि नेपाः निर्माण जुसेलि थुगु देश संरक्षण व सुव्यवस्थाया निति मंजुश्री गुरुं न्हापालाक स्थापना याःम्ह जुजु धर्माकरनिसें आरम्भ याना गोपालवंशी, महिषपालवंशी, किराँती एवं लिच्छवी, थकू जुजु व मल्ल जुजु एवं शाहकालया श्री ५ राजेन्द्र विक्रम शाह तकया जुजुपिनिगु चित्र अंकित याना तया तःगु दु” । थुगु पौभा स्वः वने ।

९२. अबुया खा स्वये

नेवाः बौद्ध दृष्टि कथं अबुया खाः स्वयेगुया थःगुहे अर्थ दु थःगु हे महत्व दु । गथे श्री स्वयम्भू धर्मधातु वागीश्वरयात

आर्यनामसंगीति सूत्रय “जनकः सर्वबुद्धानां” अर्थात् सकल बुद्धपिनि अबु खः धका प्रशंसा याना तया तल । अथेहे थःत जन्म ब्यूम्ह अपार गुण दुम्ह अबुयागु कृतज्ञता गुण लुमंका आदर सत्कार याना खाः स्वयेगु याना वया च्वन ।

अथेहे थम्ह अबु दिवंगत जुल धाःसा वसपोलया पुण्यस्मृति कथं पुण्यतीर्थ गोकर्णय वनां स्नान याना श्राद्धकर्म दानधर्म याना निसला बिया वया च्वन । ध्वहे आदर्श लुमंका गोकर्ण औसीया दिनस श्री स्वयम्भूया अग्रे निसला ब्वयेगु छगू परम्परा हनिगु प्रथा विद्यमान जुया च्वंगु दनी । थुगु धिति नं गुंला धर्मया अन्तिम दिनकुन्हु जुइगु खः ।

९३. गुंलाया नुप्यने

गुंला लच्छिया सम्पूर्ण सेवा धर्म सिधःगु ल्याखं गुंलाया अन्तिम दिन गुंला पारु धुकीकुन्हु उपासना आराधना याना अवसं च्वना मद्यमांस, आमिष वस्तु सेवन मयासे च्वना च्वपिं भक्तजनपिन्त “थःगु साविक किसिमं आहार विहार याये जिल, स्वतन्त्र जुल” धैगु किसिमं नुप्यनेगु याना वया च्वंगु जुल । थुकिया लसताय शान्तिपुरस वना शान्तिपुर गुफाया छ्वाल च्वना लगः धगः थापिं स्वना मोहनी सिन्ह फया पूजा याना विसर्जन जुइगु जुल ।

९४. गुंला पारु धुके

धन च्वय वर्णन जूगु अनुसार गुलिनं भीसं गुंला लच्छिया दुने गुंला धर्म पूर्वके निति भाव भक्तिपूर्वक अनेक विधि कथं पुण्यकार्यस सहभागी जुया अनेक प्रकारं कुशलमूल संग्रह यानागु खः, उगु पुण्यानुभावं “दुःखी पापी सुं मदयमा, सर्वत्र सर्वदाकालं स्वस्ति कल्याण मंगल जुया च्वनेमा लिसें सर्वसत्त्व प्राणी सम्बोधि ज्ञान लाभ याना काये फुपिं जुइमा” धैगु कामना यासं गुंला धर्म समाप्ति कथं विशेष प्रकारं भावभक्ति याना हर्षोल्लासपूर्वक लसता भव्य नया गुंला धर्म सुसम्पन्न याःगु जुल । अस्तु ।

गुंलां यें, यल, ख्वपया बहीचो व्वया तइगु स्वःवनेगु थाय्या नां
धलः थथे खः -

यल पाखे
चिकंबही
ओम्बहा
ज्योबहा
ईबही
धपगाःबही
इबाःबही
न्हायकंबही
दौबहा
ज्याबहाबही
उबाहाबही
उकुबहा
गुइतःबही
सुबहा
हःबहा
इखाछचेंबही
सिबहा

बुबहा
नःबही
क्वाःबहा
क्वन्तिबही
हचेन्दुबहा
टंगःबहा
यें पाखे
यतखाबहा
श्रीघःबहा
छुस्याबहा
थंबही
इतुंबहा
जनबहा
मखंबही
लायकूबही

मरुबही
लगंबहा
न्हायकंबही
च्चाकंबही
नकबही
मूबहा
खुम्बहा
खुसिबहा
ख्वप पाखे
थथुबही
क्वथुबही
रुम्बहा
भौरबही
यांबहा
विश्वकर्माछचें
आजुद्योया बहा